

|                                                                                                |                                                                                               |
|------------------------------------------------------------------------------------------------|-----------------------------------------------------------------------------------------------|
| <b>Cour<br/>Pénale<br/>Internationale</b><br><hr/> <b>International<br/>Criminal<br/>Court</b> | Nama: ICC-02/04<br><br>Nino dwe 8 me dwe me abiro<br>mwaka 2005<br><br>Leb mukwongo: Leb Munu |
|------------------------------------------------------------------------------------------------|-----------------------------------------------------------------------------------------------|

## JANG CAKO KOT ME II

Inyim: Langolkop Tuiloma Neroni Slade  
Langolkop Mauro Politi  
Langolkop Fatoumata Dembele Diarra

Karan madit me Kot: Ladit Bruno Cathala


## KIT MA PINYE TYE KWEDE I UGANDA

|                                                                                                                                                        |
|--------------------------------------------------------------------------------------------------------------------------------------------------------|
| <b>Kimwonno</b><br><br><b>Lok mung, pi Procekuta madit me Kot keken</b><br><br><b>LAMED COC MUKENE MA KIKUBO I KUM WARAN ME MAKO<br/>RASKA LUKWIYA</b> |
|--------------------------------------------------------------------------------------------------------------------------------------------------------|

### Opic pa Procekuta madit me Kot

Ladit Luis Moreno Ocampo, Procekuta madit me Kot  
Mego Fatou Bensouda, Lalub kor Procekuta madit me Kot  
Mego Christine Chung, Ladot madit lawang Procekuta madit me Kot  
Ladit Eric MacDonald, Ladot lawang Procekuta madit me Kot

**LAMED COC ME 1: CAL PA RASKA LUKWIYA MA KI KWANYO KI LANYUT ME  
ANENA KEKEN NAMA H MA TYE I KWAC PA PROCEKUTA MADIT ME KOT.**



**LAMED COC 2: DUL ME CIK ME ROMA PI KOT ME WILOBO PI BAL KI CIK ME TIC  
PA KOT KI LANYUT MAKWAKO TWERO PA NGAT MA KIMITO MAKU-NE.**

**Dul 19 me Cik me Roma pi Kot me wilobo pi bal**

**Pyem i kum twero tic pa Kot ki pyem ka kitwero kelo pido i kum lok man i Kot man.**

1. Kot bibedo kiniang atir ni en tye ki twero me tic i lok mo keken ma kikelo inyime. Kot romo neno en kikome ki moko kace twero tic i lok mo ma kikelo inyime nyo pe twero ma lube ki dul 17 me Cik me Roma pi Kot me wilobo pi bal.

2. Pyem ki twero tic pa Kot me pido i kum lok man ma tye pi tyen lok ma tye i dul 17 me Cik me Roma pi Kot me wilobo pi bal onyo kwero ni Kot pe tye ki twero me tic i lok man twero bedo ni time ka:

(a) Ngat ma kidoto onyo ngat ma kigolo waran me make onyo ngat ma gimiye camon me bino i Kot kimiyo iter dul 58 me Cik me Roma pi Kot me wilobo pi bal;

(b) Lobo ma tye ki twero i kum adot, pien lobo man tye ka kwedo ter lok man onyo tye ka pido i kum dano pi lok man; onyo dong okwedo ter lok, onyo opido i kum dano pi lok man;

(c) Lobo ma omeyero oyee ni Kot tye ki twero me tic kit ma mite iter dul 12 me Cik me Roma pi Kot me wilobo pi bal.

3. Procekuta madit me Kot romo penyo Kot me moko lok ma kwako twer me tic pa Kot ki yee me pido lok mo. Ikare me pido lok kum twero me tic pa Kot ki yee me laro lok mo, jo ma okelo lok i Kot malube ki dul 13 me Cik me Roma pi Kot me wilobo pi bal kacel ki jo ma kitimo bal ikum-gi romo bene cwalo tam gi bot Kot.

4. Twero ni lok omede onyo twero pa Kot me tic i lok romo kelo pyem ma ngat mo nyo lobo mo ma kicimo gi i tere 2 romo penyo ne kicel keken. Pyem i kum lok magi bitime i acaki me pido onyo ma nongo pido pud pe ocake. Ka mite matek, Kot romo miyo oda wek pyem ma tye i kum lok mo kikel ma kato wang acel onyo kikel iyo nge cake pa pido. Kwero yee lok, i acaki me pido, onyo inge nongo rukca pa Kot, twero time malube ki dul 17, tere 1 (c) keken me Cik me Roma pi Kot me wilobo pi bal.

5. Lobo ma kiloko i kume i tere 2 (b) ki (c) biyubo pyem ne i kum twero tic pa Kot onyo winyo lok mo i Kot con adada kit ma nongo twere kede.

6. Ma pud pe ya kimoko adot, pyem i kum yee mede ki lok onyo i kum tic pa Kot kibicwalo bot Jang cako Kot. Inge moko adot, kibicwalogi bot Jang Kot me pido. Lok weng ma kimoko ma mako kum twero tic pa Kot onyo yee mede ki lok ki twero koko apil bot Jang Kot me koko apil wek kinwo winyo lok ma rwatte ki dul 82 me Cik me Roma pi Kot me wilobo pi bal.

7. Ka onyo lobo ma kicimo i tere 2 (b) onyo (c) aye tye ki pyem, Procekuta madit me Kot twero juko ngiyo ter lok nio ka Kot obino kamaleng ki lok ma omoko ma lube ki dul 17 me Cik me Roma pi Kot me wilobo pi bal.

8. Ka pud dano tye ka kuro ngolo lok pa Kot, Procekuta madit me Kot romo kwayo twero ki bot Kot:

(a) Wek en omede ki ngiyo ter lok ma mite kit ma kikwayo iter dul 18, tere 6, me Cik me Roma pi Kot me wilobo pi bal;

(b) Wek en ogam stetmen ki owiny lok pa caden onyo wek otyek koko ki ngiyo maber lanyut ma onongo ocake ma pud pe ya kikelo pyem i kum twero tic pa Kot ki pyem ka ki twero kelo pido i kum lok man i Kot man;

(c) Me tic kacel ki lobo ma lok mako kumgi, me gengo kwale onyo rweny pa ngat ma dong Procekuta madit me Kot openyo pi waran me mako ne ma lube ki dul 58 me Cik me Roma pi Kot me wilobo pi bal.

9. Yub me keto pyem i kum twero tic pa Kot onyo yee mede ki lok pe bigengo tic ma Procekuta madit me Kot dong otimo woko, onyo oda, onyo waran ma Kot ogolo ma pud pe ya kikelo pyem man.

10. Ka Kot oye ni lok pe omyero omede malube ki dul 17, Procekuta madit me Kot twero cwalo kwac wek kinen odoco lok ma oweko yang kikwero ni Kot pe tye ki twero tic me pido i kum adot man ma lube ki dul 17 me Cik me Roma pi Kot me wilobo pi bal.

11. Ka Procekuta madit me Kot, pi woro lok ma i ter dul 17 me Cik me Roma pi Kot me wilobo pi bal, ogallo kwedo ter lok, en Procekuta madit me Kot twero penyo lobo ma lok okwako ni, me miyo adwogi me tic-gi i kum lok moni. Lok meno, ma lube ki kwac pa lobo moni ni, ka lobo ni mito kit meno, gak i mung. Ka Procekuta me Kot otweyo tam ne me mede ki kwido ter lok, en biniango lobo ma okelo pi agalagala tic i lok moni ni..

**Dul 55 me Cik me Roma pi Kot me wilobo pi bal**  
**Twero pa dano ikare me kwedo ter lok**

1. I kit me kwedo ter lok i ter Cik me Roma pi Kot me wilobo pi bal, ngat mo:

(a) Pe kibidiyo otit lok mo ma weko kitwero tweyo en onyo wek otuc bal ma en otimo;

(b) Pe kibikete i adic, pwod, bura, pwod alany onyo tim guciguci mo keken ma balo kwo pa dano;

(c) Ka kibipenyo peny i leb mapat ki ma en ngeyo dok loko maber, omyero kinong ire lagony leb maber ma en aye pe culo pire dok bene jami acoya ducu ma mite omyero kigony i leb ma en ngeyo wek dano weng giter gi i yo marom labongo kit apoka poka mo onyo bura; ki

(d) Pe kibimake onyo kikitweye labongo tyen lok madi dok pe kibimayo twero ne me timo gin mo i cawa mo keken ma en mito, nikwanyo ka tyen lok mo tye madi dok ma lube ki Cik me Roma pi Kot me wilobo pi bal.

2. Ka tyen lok tye ma oromo ma weko kitwero tamo ni ngat mo otimo bal, ma bal man tye i ter twero tic pa Kot, ka Procekuta madit me Kot onyo luloc lobo mito penyo dano man kit ma kicoyo i dul 9 mer ter Cik me Roma pi Kot me wilobo pi bal, ngat meno bene bibedo ki twero magi ma kikitite ma pud pe kicako penyo en:

(a) Omyero kiniang en, ma pud pe kicako penye, ni tye tyen lok ma romo ma weko kitamo ni gwok en otimo bal ma tye itwero tic pa Kot;

(b) En tye ki twero me ling ka kipenyo en, ma ling man pe ki twero gonyo ni en obalo onyo pe obalo pien oling alinga i kare ma ki penye;

(c) Me bedo ki lapilida ma en aye oyero me konye ki tam i lok kum cik, onyo ka ngat man pe tye ki lapilida, omyero kinen ni kinongo ire mo ka mite iter tic ki Cik, ma en aye pe culo ka en pe tye ki lonyo ma romo; ki

(d) Kipenyo en ma nongo lapilida ne tye nikwanyo ka en aye, icwinye kene, okwero twero ne me nongo tam i kum lok cik ki bot lapilida.

**Dul 57 me Cik me Roma pi Kot me wilobo pi bal**

**Tic ki twero pa Jang cako Kot**

1. Nikwanyo ka kiwaco mapat i ter Cik me Roma pi Kot me wilobo pi bal, Jang cako Kot bi tic kit ma lubo dul man me Cik me Roma pi Kot me wilobo pi bal,.

2. (a) Oda onyo lok ma Jang cako Kot omoko ma lube ki dul 15,18,19, 54, tere 2, 61, tere 7 ki 72 me Cik me Roma pi Kot me wilobo pi bal omyero pol pa lungolkop guyee.

(b) Ma kwako lok mukene, Langolkop acel pa Jang cako Kot romo tic ki twero ma Cik me Roma pi Kot me wilobo pi bal omiyo, wang ma ka onyo kimiyo man i ter Cik me tic pa Kot ki lanyut onyo ka pol pa lungolkop me Jang cako Kot aye gumiyo.

3. Me medo i kum tic ma Jang cako Kot timo i ter Cik me Roma pi Kot wilobo pi bal, Jang cako Kot romo:

(a) Golo oda ki waran kit ma mite kede pi ngiyo ter lok kace Procekuta madit me Kot ocwalo kwac mere.

(b) Golo oda ma mite, inge nongo kwac pa ngat mo ma kimako onyo ma onyute inge kati pa camon ma lube ki dul 58 me Cik me Roma pi Kot wilobo pi tim bal ma i kin gi romo bedo jami atima kit ma calo kicimo i dul 56, me Cik me Roma pi Kot wilobo pi tim bal onyo penyo kony me tic kacel ma rwatte ki cura 9 kit ma mite me konyo dano man pi yube pi adot ma kidote iye.

(c) Ka mite, kiromo miyo gwok ki mung pi dano ma kitimo bal ikum-gi ki lucaden, gwoko lanyut, gwoko dano ma kimako onyo ma onyute inge kati pa camon, ki gwoko lok ma kwako cekuriti me lobo.

(d) Miyo twero ki Procekuta madit me Kot me timo jami ma mite ma kwako ngiyo ter lok mo i lobo ma tye lamemba pa Kot labongo nongo kony me tic kacel ki lobo meno kit ma kicimo i ter cura 9; ento omyero ki neno ni kitemo i yoo ducu me winyo tam pa lobo ma lok kwako, Jang cako Kot ka oniang ni lobo man pe twero tic i kum kwac me kony me tic kacel pien lobo man pe ki teko i yub me Kot megi me tic kacel ki Jang cako Kot i kwac man, kit ma kicimo iter cura 9.

(e) Kace kigolo oda me mak onyo camon i ter dul 58 me Cik me Roma pi Kot me wilobo pi tim bal, kineno maber teko pa lanyut ki twero pa jo ma lok man kwako, kit ma kicimo i Cik me Roma pi Kot wilobo pi bal ki i Cik me tic pa Kot ki lanyut , penyo kony me tic kacel ki tung bot lobo ma rwatte ki dul 93 tere 1 (k) me Cik me Roma pi Kot wilobo pi bal me timo jami ma mite pi mako jami atikane ki cwiny me konyo dano ma kitimo bal ikum-gi.

**Dul 59 me Cik me Roma pi Kot me wilobo pi bal**  
**Kit me mako dano i lobo ma en tye iye**

1. Lobo ma tye i ter twero tic pa Kot ma onongo kwac ki bot Kot pi mak pi tutunu onyo pi mak kikume ki me miyo dano man bot Kot dok bineno ni kimako dano ma kimito ni cut cut, ma mak meno time malube ki cik lobo meno ki kit ma kiciko i cura 9 i ter Cik me Roma pi Kot me wilobo pi bal.

2. Ngat ma kimako ni kibikelo cut cut inyim ludito tic cik maloyo lok man i lobo meno ma mak otime iye; ma lube ki cik pa lobo meno, ludito tic cik bineno ni:

(a) Waran me mak obedo pi dano meno;

(b) Dano meno kimako i yo mupore kit ma omyero kitim kwede i ter Cik; ki

(c) Kiworo twero pa dano man.

3. Dano ma kimako bibedo ki twero me kwayo bot ludito tic cik maloyo lok man i lobo ma ngat ma kimito tye iye, ni kigonye pi tutunu nio i kare ma omyero kimiyo en bot Kot.

4. I ngolo lok i kum kwac ma kit man, ludito tic cik maloyo lok man i lobo ma ngat ma ki mito ni kitye ka gwoko iye bineno lok malubo kit rac pa bal ma ni otime ni, ki kace tye yub muromo ma weko lobo man twero miyo dano man bot Kot kit ma mite pi tutunu. Ludito tic cik maloyo lok man i lobo ma ngat ma kimito ni kitye ka gwoko iye pe bibedo ki twero me penyo ka waran me mako ngat meno lube ki dul 58, tere 1 (a) ki (b) i ter Cik me Roma pi Kot me wilobo pi bal.

5. Kibiniango Jang cako Kot pi kwac me gonyo pi tutunu ngat meno. Jang cako Kot dong bineno matut kace tye yub maromo ma gengo lwi pa ngat man. Ludito tic cik maloyo lok man ma i lobo ma ngat ma kimito ni ki tye ka gwoko iye, dong bingiyo loke kore ki kore ma nongo pe ya gumoko tam gi iye.

6. Ka kigonyo ngat man pi tutunu, Jang cako Kot twero waco ni kicwal bot gi kare ki kare ripot i kum gony pi tutunu i kum ngat man.

7. Tekke kigolo oda ni lobo ma tye ka gwoko ngat ma mite ni omi dano man, ci dano man kibikelo ne bot Kot labongo agalagala mo.

**Dul 60 me Cik me Roma pi Kot me wilobo pi bal**  
**Acaki winyo lok inyim Kot**

1. Tek dong kimiyo dano man bot Kot, onyo tek en dong oo i Kot kono ki cwinye kene onyo manongo lubo camon, Jang cako Kot bingiyo lok me neno ka dano man dong kiniango kit bal ma ni en otimo, ki kit twero ma en tye kwede i ter Cik me Roma pi Kot me wilobo pi bal, ki kit twero ma en tye kwede me kwayo pi gonye pi tutunu ma nongo pud kuru kede pido.

2. Ngat ma kitwero coyo ire waran me mak, twero kwayo ni kigonye pi tutunu manongo kikuru kede pido. Ka Jang cako Kot oye jami ducu ma kicimo i dul 58, tere<sup>1</sup> i ter Cik me Roma pi Kot me wilobo pi bal tye ma orwate, kiweko dano man mede ki bedo i reman. Ka onongo ni pe rwatte, Jang cako Kot bigonyo en kadi wa labongo cikke mo.

3. Jang cako Kot bingiyo kare ki kare lok ma en omoko me gwoko dano mo i reman pi tutunu onyo me gonyo ne, dok bene en twero ngiyo lok ma en omoko i kare mo keken ma lubo kwac pa Procekuta madit me Kot onyo ma lubo kwac pa ngat ma kimako. Inge ngiyo lok, en twero lokko lok ma en onongo ongolo con, ni kigony, kitwe onyo kigony ki cikke kit ma rwatte ki alokaloka ma tye.

4. Jang cako Kot bineno ni pe kiweko dano mo ori i reman pi kare malac ma kikuro pido ma nongo Procekuta madit me Kot ogale, ki agalagala ma pe cwakke. Ka kit agalagala man obedo tye, Kot bingiyo lok me gonyo dano man kadi ki cikke onyo labongo cikke mo.

5. Kace mitte, Jang cako Kot twero miyo waran me mak me neno ni dano man ma kigonyo ni bibedo tye i Kot.

**Dul 61 me Cik me Roma pi Kot me wilobo pi bal**  
**Moko adot ma pud pido pe ya ocake**

1. Ma rwatte ki lok ma kicoyo i ter dul 61, tere 2, pir kare manok inge mine kene onyo bino i Kot ki cwinye kene, Jang cako Kot biwinyo lok me moko adot ma Procekuta madit me Kot mito kelo i pido meno. Winyo lok man bitime ma nongo Procekuta madit me Kot tye kacel ki ngat ma kidoto ni ki lapilida ne.

2. Jang cako Kot, malubo kwac pa Procekuta madit me Kot, onyo pi tam mere kene, romo yee winyo lok ma nongo dano ma kidoto ni kume pe tye i Kot, me moko adot ma Procekuta madit me Kot tye ki cwinye me kelo i pido ka dano man:

(a) Okwero twero ne me bedo tye; onyo

(b) Olwi woko onyo pe kitwero nongo en dok kitemo yo weng ma twere me nongo en wek kikele obed tye i Kot me niange pi adot ki me bedo pi winyo lok me moko adot i kume.

Ka kit man, lapilida me pyem adot mo bicung ka wang dano man ka Jang cako Kot neno ni man mitte pi tic i ter cik labongo bura.

3. I kare ma opore ma pud pe ya kiwinyo lok man, dano man:

(a) Kibimine kopi me karatac ma kicoyo iye adot ma Procekuta madit me Kot mito kelo kwede pido i kum dano man; ki

(b) Kibiniange i kum lanyut ma Procekuta madit me Kot tye ki yub me tic kwede i pido. Jang cako Kot twero golo oda ma kwako tucu lok kamaleng pi tyen lok ma kwako winyo lok man.

4. Procekuta madit me Kot twero mede ki kwedo ter lok dok twero loko onyo bwoto adot mogo ma nongo pido pud pe ocake. Ka kimito loko onyo weko adot, omyero kiniang dano man ma kare odong malac nio icako winyo lok i Kot. Ka kimito bwoto adot, Procekuta madit me Kot bitito bot Jang cako Kot gin ma oweko kibwoto adot man.

5. Ikare me laro lok i Kot, Procekuta madit me Kot bikelo lanyut, pi adot acel acel, ma cwako adot ma romo weko kitwero tamo ni dano man otimo bal man kit ma kiwaco i adot. Procekuta madit me Kot twero tic ki lanyut ma kicoko lok wiye wiye me lanyut ki mitte ni en olwong lucaden ma kigeno ni bikati ka miyo caden i pido.

6. Ikare me winyo lok, dano man twero:

(a) Kwero adot ma tye i kume;

(b) Pyem i kum lanyut ma Procekuta madit me Kot okelo; ki

(c) Kelo lanyut.

7. Jang cako Kot, inge winyo lok bineno ka lanyut tye ma romo, ma weko kiromo tamo ni dano man otimo bal kit ma kidote iye ducu ki acel acel. Malubo kit ma en oneno kwede, Jang cako Kot bi:

(a) Moko adot mogo ma en onongo ni lanyut ma kwako gi tye ma romo, ci cwalo dano ma kidoto ni i Jang Kot me Pido wek kipid i kum adot man kit ma kimoko;

(b) Kwero moko adot ma tye ma en onongo ni lanyut ma tye pe romo;

(c) Juko pido kong pi kare man ka dok waco ki Procekuta madit me Kot me tamo pi:

(i) Kelo lanyut mukene onyo mede ki kwido ter lok i kum adot moni; onyo

(ii) Loko adot pien lanyut ma kikelo nen calo cimo bal ento bal mukene mapat ma bene tye i twero tic pa Kot.

8. Ka Jang cako Kot okwero moko adot, pe kigengo Procekuta madit me Kot me kwayo pi moko adot lacen ka en odwogo ki lanyut mukene.

9. Inge moko adot ma nongo pido pe ya ocake, Procekuta madit me Kot, twero loko adot ki twero pa Jang cako Kot kun bene miyo ngec ki ngat ma kidoto, dok romo loko adot meno. Ka Procekuta madit me Kot myero medo onyo loko adot me timo jami meno myero ki winy loke i Kot, winyo lok me moko pido man omyero kitim. Ka Kot ocake, Procekuta madit me Kot romo penyo twero ki bot Jang Kot pido me weko adot woko.

10. Twero waran me mak, ma onongo kimiyo con, tere gik pi adot ma Jang cako Kot pe omoko onyo ma Procekuta madit me Kot dong obwoto woko.

11. Tek dong kimoko adot malubo dul man, Opici pa Preciden me Kot biketo Jang Kot me pido, ma rwatte ki dul 64,,tere 9,ki tere 4, me Cik me Roma pi Kot me wilobo pi bal, ma biloyo lok pido weng ki tic mogo pa Jang cako Kot ma rwatte dok ma kitwero tic kwede i winyo pido.

#### **Dul 67 me Cik me Roma pi Kot me wilobo pi bal**

##### **Twero pa ngat ma kidoto**

1. Ngat ma kidoto bibedo ki twero ni pido i kume bibedo idyer lwak, kit ma tye i ter Cik me Roma pi Kot me wilobo pi bal, imiti me pido labongo bura dok ma lubo cikke ma piny ene ni, ma kitiyo ki dano weng marom:

(a) Ngat ma kidoto omyero kiniang en ter adot ma tye, kore ki kore dok labongo gale, i leb ma ngat ma kidoto ni niang dok loko maber;

(b) Ngat ma kidoto omyero obed ki kare ki jami tic weng mamite me yube pi pido adot dok bene nongo twero gwenyo lok ki lapilida ne, ma en aye oyero, i mung ki labongo ayela yela mo;

(c) Ngat ma kidoto omyero kiwiny pido ne labongo agalagala ma tere peke;

(d) Kit ma kicoyo i dul 63, tere 2 i ter Cik me Roma pi Kot me wilobo pi bal, ngat ma kidoto omyero obed tye i Kot i kare me pido en kikome onyo ki kony pa lapilida ma en ngat ma kidoto aye oyero, omyero kiniang ngat ma kidoto pi kit twero ne me bedo ki lapilida; ka en pud pe tye kwede, ci Kot konyo en nongo lapilida, ka bimate me neno ni bura obedo peke i pido, dok labongo cul ka en pe tye ki lim maromo;

(e) Twero me penyo maber, onyo me weko kipeny maber, lucaden pa jo ma odoto en ki me kelo lucaden ma mege, ma bene kipeny gi marom aroma ki kit ma kipeny lucaden

mukene ni. Ngat ma kidoto ni bene bibedo ki twero me pyem adot dok me kati ki lanyut mukene ma kitwero tic kwede i ter Cik me Roma pi Kot me wilobo pi bal;

(f) Twero me bedo ki ladiro gonyo leb ma kwiri, labongo cul, pi lok ki coc kit mamite i kit me tic ki cik labongo bura, ka winyo lok i Kot onyo jami ma kitiyo kwede i Kot obedo i leb ma ngat ma kidoto ni pe niang onyo pe loko maber;

(g) Pe me diyo ngat ma kidoto me tito lok onyo me ye bal, ni en twero ling alinga ka kipenye;

(h) Tito lok onyo coyo ne me pyem adot labongo kwonge; ki

(i) Pe omyero kilok i wiye peko me loko lok ni en aye omyero okel lanyut i kit macalo adot tye kwede.

2. Ma pat ki lok ma omyero kituc ma lubo Cik me Roma pi Kot me wilobo pi bal, Procekuta madit me Kot bene, labongo agalagala ma tere peke, omyero onyut bot lupyem adot lanyut ma Procekuta madit me Kot tye kwede ma en ngeyo ni nyuto onyo nen calo nyuto ni ngat ma kidoto ni pe labal, onyo ma weko bal pa dano man doko tidi, onyo ma weko lanyut pa Procekuta madit me Kot pe gene. Ka akalakala tye kit me niang lok man, Kot aye bi ngolo lok.

### **Dul 21 me Cik me tic pa Kot ki lanyut**

#### **Miyo kony ki tam i lok kum Cik.**

1. Ma nongo kilubo dul 55, tere 2 (c) ki dul 67, tere 1 (d) me Cik me Roma pi Kot me wilobo pi bal, kibiketo kit ma kimi kony i kum tam madok i kum Cik, i Cik me tic pa Kot, malubo tam, ma Karan madit me Kot okelo, inge gwenyo tam ki lucung pa Pilida ma pe jenge i kum Kot onyo dul ma tiyo i kum cik, kit ma kiloko iye dul 20, tere 3 me Cik me tic pa Kot ki lanyut.

2. Lakaran madit me Kot biyabu ki bigwoko nying Pilida ma rwatte ki rwom ma kicimo i dul 22 me Cik me tic pa Kot ki lanyut. Ngat man biyero lapilida ne en kikome ki nying lupilida ma tye onyo twero yero lapilida mukene ma rwatte ki rwom ma mite kace kiye ni kimed nying gi i kin nying ma tye.

3. Ngat mo romo penyo ki bot Opici pa Preciden ni kong kinen odoco lok ma kimoko me kwac ne me nongo kony pa lapilida. Lok ma opici pa Preciden omoko aye bedo me agiki. Ka kwac man kikwero, kwac mukene kiromo cwalo ne bot lakaran madit me Kot inge nyutu aloka loka i gin ma onongo tye.

4. Ngat ma mito cung pire kene bimiyo ngec i coc bot karan madit me Kot con kit ma twero kede.

5. Ka ngat man owaco ni en pe etye ki lim me culo pi kony i lok kum cik ki ka dok kinongo ni lok man bene pe obedo lok ada, Jang Kot ma tye ka tic i kum lok man i cawa eno ni twero miyo oda me dwoko wel cul weng pi kony ki bot lapilida.

**Dul 112 me Cik me tic pa Kot ki lanyut**  
**Mako dwon ki cal video ikare me penyo peny i lok mogo.**

1. Tekke Procekuta madit me Kot openyo ngat ma dul 55, tere 2 me Cik me Roma pi Kot me wilobo pi bal, kidoto ni, onyo ngat ma waran me mako onyo camon me bino i Kot kimiyo pire i ter dul 58, tere 7, me Cik me Roma pi Kot me wilobo pi bal, openyo peny man ci kibimako ne ma calo cal video onyo ma calo dwon me awinya, iyo ma rwatte ki jami ma kicoyo piny magi:

(a) Kibiniango ngat ma kibipeny, i leb ma en niang ki loko maber, ni peny ma ki bipenye ni kibimako dwone ki cal video ne, dok bene ngat ma lok kwako ni romo kwero ne ka mito. Gin ma nyutu ni lok man ki lagam kityeko nongo ki bot dano man kibicoyo piny. Ngat man, twero lok ki lapilida ma mege i mung ma pud pe ya ogamo peny, ka lapilida ma mege kome tye. Ka ngat ma kibipeny okwero ni pe ki mak dwone onyo pe kimak cal video i kare me penyo peny, ci yo me tic ma kicoyo i dul 111 me Cik me tic pa Kot ki lanyut kibilubo ne;

(b) Jalo twero pa ngat ma lok omako ni me weko kum lapilida ne obed tye ka kipeny en, kibicoyo ne piny, dok bene ka twere kibimako dwon onyo cal video me gwenyo lok ne.

(c) Ka angola ngola obedo tye ikare me peny, kimako dwon ki cal video lok kum juko lok man kacel ki cawa ma otime iye, lacen ka dong kicako mede ki peny bene omyero kitit man ki cawa ne;

(d) I agiki me penyo peny, kibimiyo kare bot ngat ma kipeny ni, wek openy peny i kum lok mo keken ma en pe oniang iye onyo owaco ki ka me medo gin mo keken ma en mito. Cawa ma kipeny kwede lapeny kibicoyo piny;

(e) Tep ma kimako kwede cal ki dwon iye kibiloko kopi ne i coc oyot yot kit ma nongo twere kwede inge agiki me peny ki kopi pa lok ma kicoyo ni kibimiyo bot ngat ma ki penyo kacel ki kopi me dwon onyo cal ma ki mako ni onyo, ka kitiyo ki cuma ma mako tep mapol lawang acel, ci kibimiyo ire tep acel ma kimako cal onyo dwon iye kikome;

(f) Tep ma kimako iye dwon onyo cal video me acaki kibimwono doge i nyim ngat ma kipenyo ni ki lapilida ne, kace tye, i ter nying Procekuta madit me Kot ki pa ngat ma kipenyo ki pa lapilida, ka gi ye.

2. Procekuta madit me Kot bitemo ki teke duc me coyo lapeny malube ki dul 112, tere 1 me Cik kit me tic pa Kot ki lanyut. Pi tyen lok mogo ma nongo pe tye kit yo mo, kiromo penyo ngat mo labongo mako dwone onyo cal video kama nongo kit ma pinye tye kwede pe ye mako gin ma kit meno. Kace tye kit man, ci gin ma oweko pe kimako dwon onyo cal omyero kiket i coc i yo malube ki dul 111 me Cik me tic pa Kot ki lanyut.

3. Ka, malube ki dul 112, tere 1(a) onyo 2, me Cik me tic pa Kot ki lanyut penyo peny pe kimako cal onyo dwon, ngat ma kipenyo binongo kopi me stetmen.

4. Procekuta madit me Kot twero yero me lubo kit yoo ma kicimo i cik eni ka tye ka penyo dano mukene mapat ki dano ma kicimo gi i dul 112, tere 1 me Cik me tic pa Kot ki lanyut, tutwale kama tic kit man konyo me cango onyo dwoko cen bange onyo bal wic pa dano ma nongo kibutu kwede tek-tek onyo, latin, onyo lugoro ka gitye ka miyo lanyut ma megi. Procekuta madit me Kot romo cwalo kwac bot jang Kot pi lok meno.

5. Jang cako Kot romo, ma rwatte ki dul 56, tere 2, me Cik me Roma pi Kot me wilobo pi bal, romo golo oda ni kit me cik man kiti kwede me penyo ngat mo keken.

**Dul 117 me Cik me tic pa Kot ki lanyut**  
**Gwoko dano i reman i lobo ma en tye iye**

1. Kot bitimo jami mamite me neno ni kiniange pi mako dano inge kwac ma Kot ocwalo malube ki dul 89 onyo 92 me Cik me tic pa Kot ki lanyut. Tek dong Kot onongo ngec man, Kot bineno ni kimiyo ki dano man kopi me waran me mak ma Jang cako Kot omiyo, malube ki dul 58 me Cik me tic pa Kot ki lanyut, ki lok mukene ma kicimo i ter Cik me Roma pi Kot me wilobo pi bal, ma rwatte ki adot i kum en. Lanyut magi kicoko ki bimiyo i leb ma en niang dok loko maber.

2. I kare mo keken inge mak, dano man twero cwalo koko bot Jang cako Kot pi cimo lapilida me konye i lok ma tye i Kot ci Jang cako Kot bingolo lok i kum koko man.

3. Ka koko tye ni pe kimiyo waran me mak i yo mupore kit ma kicoyo iter dul 58, tere 1 (a) ki (b) me Cik me tic pa Kot ki lanyut, omyero koko kicoo kicwal bot Jang cako Kot kwac man omyero otit atir kwene ma koko ki peny tye iye. Inge nongo lagam lok pa Procekuta madit me Kot, Jang cako Kot bingolo lok i kum koko man labongo agalagala.

4. Ka ludito tic cik maloyo lok man i lobo ma ngat ma kimito tye iye oniango Jang cako Kot ni kikwayo pi gonyo ngat man, kit ma kicoyo i dul 59, tere 5, me Cik me tic pa Kot ki lanyut, Jang cako Kot bicwalo ki gin tam i kare ma lobo man omiyo.

5. Ka kiniango Jang cako Kot ni ludito tic cik maloyo lok man i lobo ma ngat ma kimito ni kitye kagwoko iye ogonyo dano man pi tutunu, Jang cako Kot biniango lobo man kit yo mene ki awene ma en mito enong ripot kum gony pi tutunu man.

**Dul 118 me Cik me tic pa Kot ki lanyut**  
**Gwok i reman i gang kal pa Kot**

1. Ka ngat ma kimiyo bot Kot ocwalo koko me acaki kun kwayo pi gony pi tutunu kun kuru kwede cake pa pido onyo i kare me oo ne i Kot wang ma acel ma, rwatte ki dul 121 me Cik me tic pa Kot ki lanyut onyo iyo ngeye, Jang cako Kot bimoko lok i kum kwac man labongo gale, inge penyo tam pa Procekuta madit me Kot.

2. Jang cako Kot bingiyo tam ma omoko me gonyo onyo me mako dano man i reman ma rwatte ki dul 60, tere 3 me Cik me Roma pi Kot me wilobo pi bal, kare ki kare inge nino 120 ki romo timo man caa mo keken ka ngat man onyo Procekuta madit me Kot openyo.

3. Inge oo i Kot wang ma acel, kwac me gony pi tutunu omyero kiket i coc. Kibimiyo ki Procekuta madit me Kot ngec i kum kwac man. Jang cako Kot bimoko inge gamo ki neno ngo ma tye i coc pa Procekuta madit me Kot ki dano ma kitweyo i reman. Jang cako Kot romo moko lwongo pido inge nongo kwac pa Procekuta madit me Kot onyo pa dano ma kimako onyo imiti pa Kot. Pido omyero obed otime wang acel i mwaka.

**Dul 119 me Cik me tic pa Kot ki lanyut**  
**Gony i ter cikke**

1. Jang cako Kot romo keto cikke acel onyo makato ma ngolo twero mogo ma ikine tye iye jami magi:

(a) Ngat man pe okat kabedo ma Jang cako Kot ocimo ka pe Jang Kot omine twero kamaleng.

(b) Ngat man omyero pe ocet i kabedo mogo onyo obed ki dano mogo malube ki geng pa Jang cako Kot .

(c) Ngat man pe olok atir onyo iyoo mo keken ki dano ma kitimo bal ikum-gi onyo lucaden.

(d) Ngat man pe oti tic mogo ma kigengo.

(e) Ngat man omyero obed i kabedo ma Jang cako Kot ocimo.

(f) Ngat man omyero obin ka nongo camon ki bot dul pa luloc onyo ki bot dano mo ma Jang cako Kot omiyo twero me tic man.

(g) Ngat man omyero ocul bond onyo ojeng jami ma mege me cung pire, ma Jang cako Kot bimoko wel, awene ki kit me cul.

(h) Ngat man omyero omii bot Karan madit karatac me identiti ne weng, tutwale karatac wot ma mege me donyo i lobo mukene.

2. Pi kwac pa ngat ma lok man kwako onyo Procekuta madit me Kot, onyo imiti pa Kot, Jang cako Kot i kare mo keken romo lokko cikke ma kiketo ma rwatte ki dul 1 me Cik me tic pa Kot ki lanyut.

3. Ma pud pe ki kwayo onyo ki lokko cikke ma dwoko twero, Jang cako Kot bipenyo tam pa Procekuta madit me Kot, ngat ma lok man kwako, onyo lobo ki dano ma kitimo bal ikum-gi, lobo ma pir-gi tek, ma oloko ki Kot i kum lok man ki dano ma ot Kot tero calo romo bedo i bal inge gonyo onyo keto cikke.

4. Ka Jang cako Kot oniang ni ngat ma lok man kwako pe olubo gin ma kimito acel onyo makato ma kiketo, man romo, i kwac pa Procekuta madit me Kot, onyo pi miti pa Kot, golo oda me mako ngat man.

5. Ka Jang cako Kot omiyo camon, itic ma lubo dul 58 tere 7 me Cik me Roma pi Kot me wilobo pi bal, en tye ki cwiny me ngolo twero mogo, bineno cik ma kwako lok man i lobo ma kicwalo iye camon. Kun kitiyo ma pe kituro cik me lobo ma kicwalo iye camon ni. Jang cako Kot dong bimedede ki tic kun lubo dul 119, tere 1, 2, ki 3 me Cik me tic pa Kot ki lanyut. Ka Jang cako Kot onongo lok ni ngat ma lok kwako pe romo lubo cikke ma kiketo, Jang cako Kot bimedede ki tic kun lubo dul 119, tere 4, me Cik me tic pa Kot ki lanyut.

**Dul 120 me Cik me tic pa Kot ki lanyut**  
**Jami me twec**

Ikare me pido i Kot jami me twec pe kibitic kedgi nikwanyo kace mite me gengo lwir ki i Kot onyo pi tyen lok me gwoke, ci kibikwanyo jami twec man ka ngat man oo i nyim Jang Kot

**Dul 121 me Cik me tic pa Kot ki lanyut**  
**Lok i kare me laro lok me moko adot**

1. Ngat ma kigolo waran me mako onyo camon pire, malube ki dul 58 me Cik me Roma pi Kot me wilobo pi bal omyero kikele labongo gale inyim Jang cako Kot, ma nongo Procekuta madit me Kot bene tye, tekke en oo i Kot. Ma rwatte ki lok ma tye dul 60 ki 61 me Cik me Roma pi Kot me wilobo pi bal, ngat man bibedo ki twero ma kicoyo i dul 67 me Cik me Roma pi Kot me wilobo pi bal. Ibedo man me Kot mukwongo, Jang cako Kot biyero nino ma en tye iye ki cwiny me winyo lok pi moko adot. Bineno ni nino dwe man ki agalagala mo ma tye, kit ma mite i dul 121, tere 7 me Cik me tic pa Kot ki lanyut, pi niango lwak.

2. Ma rwatte ki dul 61, tere 3 me Cik me Roma pi Kot me wilobo pi bal, Jang cako Kot bimoko tam ma mite ma rwatte me miyo ngec ikin Procekuta madit me Kot ki ngat ma ki golo oda me mako onyo kimiyo camon me bino i Kot. Ikare me miyo ngec man:

(a) Ngat ma lok kwako ni romo nongo kony onyo lapilida macung pire ma en aye oyero onyo lapilida ma kimiyo ire.

(b) Jang cako Kot bilwongo kacoke me neno ni miyo ngec otime kit ma mite. Pi lok acel acel, langolkop me Jang cako Kot biyero wek oyub kacoke calo man ka en mito onyo ka Procekuta madit me Kot onyo ngat ma kimako okwayo.

(c) Lanyut weng ma kinyutu bot Procekuta madit me Kot ki ngat ma kimako pi miti me moko pido kibicwalo bot Jang cako Kot.

3. Procekuta madit me Kot bimiyo ki Jang cako Kot ki ngat ma kigolo oda me mako ne ni kikelo i Kot, nino ma pe kato 30 ma pe ya nino me moko pido oromo, kore ki kore adot kacel ki lanyut weng ma ngat meno bimito tito ikare me pido.

4. Kace Procekuta madit me Kot bimito loko adot malube ki dul 61, tere 4 me Cik me Roma pi Kot me wilobo pi bal, en biniango Jang cako Kot ki ngat ma kigolo oda me mako ni kikelo i Kot nino ma pe kato 15 ma pe ya nino me pido oromo i kum lok me loko

adot kacel ki lanyut weng ma Procekuta madit me Kot bimito kelo me jolo adot ikare me pido.

5. Kace Procekuta madit me Kot bimito kelo lanyut manyen ikare me pido, en bimiyo lanyut man weng bot Jang cako Kot ki ngat ma kigolo oda me mako ni kikelo i Kot i kin nino ma pe kato 15 ma pe ya nino pido oromo.

6. Ka ngat ma kigolo oda me mako ni obin i Kot bimito kelo lanyut malube ki dul 61, tere 6, me Cik me Roma pi Kot me wilobo pi bal, en bimiyo wel lanyut man bot Jang cako Kot nino ma pe kato 15 ma pe ya nino pido oromo. Jang cako Kot bicwalo wel lanyut man bot Procekuta madit me Kot labongo gale. Ngat ma kimako bimiyo wel lanyut ma en bikelo ne me lagam i kum adot ma kiloko onyo wel lanyut manyen ma Procekuta madit me Kot omiyo.

7. Procekuta madit me Kot onyo ngat ma kigolo oda me mako ni obin i Kot twero penyo Jang cako Kot wek odir nino me moko pido. Jang cako Kot twero bene, pi tic me wot anyim, ye wek kidir nino pido.

8. Jang cako Kot pe biketo itic adot ki lanyut ma ki kelo inge cawa ma kimiyo onyo ka nino ma kidiro anyim otyeko okato.

9. Procekuta madit me Kot ki ngat ma kidoto romo koko apil bot Jang cako Kot pi lok ma tye i ter cik ma ikine tye iye lok ma kiweko cimo wang pi bal ma tye i dul 31, tere 1 me Cik me Roma pi Kot me wilobo pi bal, ma man omyero otime ma nongo pido pud odong makato nino 3 anyim. Kopi karatac magi omyero kicwal bot Procekuta madit me Kot onyo bot ngat ma kidoto kit ma rwate labongo gale.

10. Regitri biyabo ki gwoko gin weng ma ada ma kicoyo ikare me pido inyim Jang cako Kot, medo ikine tye jami weng ma kicwalo bot Jang Kot ma rwatte ki Cik me tic pa Kot ki lanyut. Ma rwatte ki yo me weko lok obed i mung, ki gwoko lok ma lobo omiyo, Procekuta madit me Kot twero neno lok ma kicoyo, ngat ma kimako ki dano ma kitimo bal ikum-gi onyo lucungo pir-gi ikit me lok i kum cik ma tye i pido kit ma rwatte ki dul 89 wa 91 me Cik me tic pa Kot ki lanyut.

### **Dul 122 me Cik me tic pa Kot ki lanyut**

### **Kit me moko pido inyim ngat ma kidoto.**

1. Langolkop ma wonkom me Jang cako Kot bipenyo lutic pa regitri ma konyo Jang Kot me kwano kamaleng adot kit ma Procekuta madit me Kot tito kede. Langolkop ma wonkom bimoko kit ma pido omyero owot kede ki, i atika ne, twero cako oda ki gin atima ma itere en bimito lanyut obed i gin ma kicoyo ikare me pido wek ki kwan.

2. Ka peny onyo pyem tye i kum twero me tic pa Kot, onyo ka lok moni ni kitwero winyo ne i Kot, kibitic ki dul 58 me Cik me tic pa Kot ki lanyut.

3. Ma pe ya ki pido i kum lok ada me adot moni ni, langolkop ma wonkom me Jang cako Kot bi penyo Procekuta madit me Kot ki ngat ma kidoto ka gin bimito kwero onyo tito tam-gi ma rwatte ki lok kit ma mite i pido ma pe ya moko pido ocake.

4. Ka lok mo dong kityeko kelo inyim Kot ikare me pido pe dok kibiye kinwoyo odoco i pido menu kit ma kinyutu kwede i ter dul 122, tere 3, me Cik me tic pa Kot ki lanyut.

5. Ka kikwero onyo ki kitito tam ma kiloko pire i dul 122, tere 3, me Cik me tic pa Kot ki lanyut ci langolkop ma wonkom me Jang cako Kot bilwongo joo ma kiloko ikumgi i dul man tere 3 me tito pyem weng, iyo mo keken ma en ngat moni biyube kede. Ngat man bibedo ki twero i gamo lok man;

6. Ka lok ma kikwero onyo tam ma kiwaco obedo kit ma kiwaco i dul 122, tere 3 me Cik me tic pa Kot ki lanyut, Jang cako Kot bimoko kace kirib lok ma okati ni ki lok ma kitye kangiyo ne i adot, onyo me poko kin gi, ci Jang cako Kot romo juko pi tutunu lok me moko adot ki ngolo kop i kum lok ma okati ni;

7. Ikare me winyo lok ada i kum gin ma otime,, Procekuta madit me Kot ki ngat ma kidoto bitito lara ma meg i ni ma rwatte ki dul 61, tere 5 ki 6, me Cik me Roma pi Kot me wilobo pi bal.

8. Jang cako Kot twero ye ni Procekuta madit me Kot ki ngat ma kidoto gutit tam-gi me agiki kun cake ki Procekuta madit me Kot.

9. Lube ki dul 61 me Cik me Roma pi Kot me wilobo pi bal, dul 69 i ter Cik man kibitic kwede kun kiloko lok kit ma nongo mite;

#### **Dul 123 me Cik me tic pa Kot ki lanyut**

#### **Gin atima wek ngat ma lok kwako obed tye ikare me moko adot**

1. Ka Jang cako Kot omiyo waran me mak, onyo camon me bino i Kot, i ter dul 58, tere 7, me Cik me Roma pi Kot me wilobo pi bal, pi ngat mo, ci kimako ngat man onyo kimine camon, Jang cako Kot bineno ni ngat meno kiniange i kum dul 61, tere 2 me Cik me Roma pi Kot me wilobo pi bal.

2. Jang cako Kot romo leyo tam ki Procekuta madit me Kot, ka en Procekuta madit me Kot okwayo onyo Kot pi en kene tamo ni mite, wek kinen ka tyen lok mo tye ma weko kiromo winyo lok i kum moko adot malube ki dul 61, tere 2(b) me Cik me Roma pi Kot me wilobo pi bal. Ka ngat ma lok man kwako tye ki lapilida ma ka mege ma Kot ngeyo, ci lapilida pa ngat man bibedo tye ikare me loko tam man ka pe dok gwok onyo Jang cako Kot otamo mapat.

3. Jang cako Kot bineno ni golo waran me mak pi ngat ma lok kwako kimiyo. Kace oda me mak man pud pe ya kiketo i tic, pi kin kare ma ori ma romo inge miyo oda man, Kot man omyero onen ni gin ma mite atima weng kitim wek kinong ki kimak ngat man.

#### **Dul 124 me Cik me tic pa Kot ki lanyut**

##### **Twere kwero me bedo tye i winyo lok me moko pido**

1. Ka ngat ma lok kwako kome ni romo bino i Kot ento mito kwero twero ne me bedo tye i winyo lok me moko adot, en bicwalo kwac mere icoc bot Jang cako Kot ma twero loko tam i kum lok man ki Procekuta madit me Kot kacel ki ngat ma kidoto ma lapilida ne romo konye onyo cung pire.

2. Winyo lok me moko adot malube ki dul 61, tere 2 (a) me Cik me Roma pi Kot me wilobo pi bal, bitime ka Jang cako Kot oniang ni ngat ma kidoto ngeyo twero ne me bedo tye ikare me pido ki adwogi pa kwero twero man.

3. Jang cako Kot romo miyo twero ki yubo yub ma mite ma weko ngat man twero lubo pido ki woko pe ki i ot Kot kun nongo kitiyo ki waya me cwalo lok kace mite.

4. Kwero twero me bedo tye i winyo lok pe gengo Jang cako Kot me gamo tam ma kiketo i coc i kum lok ma tye inyim Jang Kot ma kikelo ki bot ngat ma lok kwako.

#### **Dul 187 me Cik me tic pa Kot ki lanyut**

##### **Gonyo lok mawoto kacel ki kwac me mine bot Kot.**

Lube i ter dul 67, tere 1 (a) me Cik me Roma pi Kot me wilobo pi bal, ki ma rwatte ki dul 117, tere 1 me Cik me tic pa Kot ki lanyut, kwac i ter dul 91 biwot kacel, kit ma rwatte, ki gonyo waran me mak onyo lok ma kingolo i Kot mako ki gonyo coc mo keken ma pire tek ma tye i ter Cik me Roma pi Kot me wilobo pi bal, i leb ma ngat ma kimako niang dok loko maber.